

錢海岳撰

南明史

第十二册



局

三

本明主

一



錢海岳撰

南明史

第十二册
列傳
卷九十一至卷一百

中華書局

南明史卷九十一

列傳第六十七

無錫錢海岳撰

儒林一

自諸子興而聖人之道衰，司馬遷、劉向父子以儒與諸子並列而儒輕，竺乾之學入中國而儒雜。魏晉以後，儒者專己守殘，佔畢章句。或空談遁於玄虛，或好大驚於名法。尚同兼愛，迷於夷夏之大防。遂至擬式以璽綬與人爲不可，而世目狂惑；馮道之歷事八姓，而頌爲聖人。人頭畜鳴，幾不知天地間有名教事。夷狄之憑陵，中原之陸沈，非是之故而誰咎歟？蓋禮義名簡，國之綱維，所以建功立業也，然武功必本文德。周宣王命方叔、召虎，復文武之境土，而所與居者，張仲孝友，故克成中興之功。

太祖撫有函夏，稽古右文，崇尚伊雒，薛、胡、蔡、羅、陳、王、高、顧，名儒輩出。洎於天

崇，學術漸漓，窮年羸力，乞乞蒼素，以帖括爲讀書，類書爲學問，破碎支離，披猖磔裂。構饜並官，周孔是棄，朝少通經致用之士。史稱威宗嘗問宰相須用讀書人何謂，諸臣不能對，首輔奏：「容臣至閣會議具奏。」內侍無不掩笑。夫以不學無術之人，當論道經邦之任，欲使通方弘用，難矣！卒至猓、獮、兪跳宕赤縣，宗社丘墟，衣冠左袵。火之消膏，不之覺也。

南渡馬上經營，日不暇給，而召用儒臣劉宗周、黃道周，山谷菰蘆潛修之士，如顧炎武、黃宗羲、王夫之等，玄纁束帛，翹車相望，庶幾修文德以固根本，有周宣之規模矣。然用之不能久，久而不能盡。棄尊彝而寶康瓠，舍珠玉而收瓦礫。負堯、舜君民之思，外王內聖之學。當元氣血脈殆絕之後，先後同歸於盡，未能出大厄大劫，以扶國運。

夫儒盛則世盛，儒衰則世衰。甚至大儒無遺，則天地之大厄大劫隨之。大儒之生，實與國相表裏。血脈元氣之絕，大厄大劫之作，又何怪焉！

明講心性，馳騫語錄，其經訓家法，於漢唐諸儒，未足以燭重昏而發豐蔀，然人析義利之微，識邪正之路。平居侈袂方履，乾螿朽蠹諸子，一聞國難，戴髮勤王，蹈白刃爲至樂，視畢命如還鄉。在三之節，蒙險愈厲。謂非三百年培養人才禮儒而獲其報哉！迨事無可爲，抱道窮山，各仞師說，富貴不移，寒餓不屈。品行勵人心，文章維世道，爲巨人碩德，爲孝子奇士，爲天下可一不可二之人。即至體國經野濟世安民之略，五音六律八綫九章之術，亦

有守先待後、舍我其誰之概。發思古之情，作膺懲之氣，胡運有時而盡，中國亡而不亡，夷夏大防，不以亂而漸滅。鬱之極而出之愈大，摧之久而發之愈壯。天理恒存，人心不死，又非諸儒讀書明道，窮理養氣，能以天下己任、綱嘗共肩者不至此！

儒林諸子，大半見清史。顧以從事焦原，名懸象魏，詳學術而略志事。今特輯之，或其人究无所施，則採其粹言爲傳，菜瓜祭飲食之人，芹藻釋瞽宗之奠。後世有考明儒源流者，或亦有取於斯夫！

孫奇逢 子立雅等 張果中 趙御衆 李封 隰崇岱 陳鉉 王之徵 王體健 賈三槐 馬爾楹 高
鏞 耿極 刁包 子再濂 王餘佑 彭毓宗 杜越 毛三光 殷之紐 田極 趙景皋 霍連 孔衍
學 喬己百 黃淳耀 子盛 弟淵耀 戴亮 沈國模 史孝威等 王朝式 邵曾可 蘇元璞 鄭錫
元 史標 邵元長 韓孔當 俞長民 張履祥 吳蕃昌 從弟謙牧 錢寅 凌克貞 沈磊 何汝霖
呂瓚 安道 丘雲 張嘉玲 張圓貞 孫台衡 沈昀 弟蘭咸 陳確 從子枚 蔡遵 屠安世 鄭宏
葉敦良 施博 潘平格 陶履平 陳其憲 趙忠濟 王同塵 憚日初 子桓等 楊瑀等 陸士
楷 陸世儀 馬負圖 陳瑚 顧夢麟 王日新 楊彝 盛敬 江士韶 芮長恤 蔡所性 吳
光 陸卿鵠 張怡 雷士俊 雷子霖 李顥 李柏 惠思誠 白奐彩 党湛 王化泰 張承

烈 蔡啟胤 賈漢英

孫奇逢，字啟泰，容城人。少與鹿善繼以聖學相砥礪。萬曆二十八年舉於鄉。居京師，與左光斗、魏大中、周順昌善。親喪，廬墓凡六年。璫禍作，光斗、大中、順昌被逮，與善繼、父正及張果中拮据調護，供棗饋。時孫承宗督師榆關，善繼贊軍事。初嘗約奇逢至軍中，將疏任贊畫，辭免。至是遣弟奇彥馳書求援於承宗，曰：「左、魏諸君子，善類之宗，直臣之首，橫被奇冤，有心者孰不扼腕。昔盧柎，一莽男子耳，謝榛以布衣爲行哭於燕市，曰：『諸君今不爲盧生地，乃從千載下哀湘而弔賈乎？』李夢陽在獄，何大復致書楊一清，求一援手，康海至不自愛其名。左、魏之品，可方夢陽，非柎所敢望。奇逢一介書生，無繇哭訴，尚慚謝榛。閣下名位，比肩一清，豈至出海下乎！承宗覽書，即具疏請朝，面陳機務。魏忠賢大懼，謂承宗興晉陽之甲，夜遠御床泣，馳詔止之。尋誣三君子贓以萬計，嚴刑迫比。奇逢倡義捐輸齎京師，而三君子已死，乃經紀其喪歸里。時邏較嚴急，士大夫觸手糜爛。容城密遷京師，奇逢暴行酷暑烈日中，舉旛擊鼓，衆皆爲危。奇逢則曰：「人固有死，爲三君子死，死不恨。且死生有命，奄其如我何！」以是義聲震天下。

崇禎九年，清兵薄容城，設方略拒守，城賴以全。清兵入關，移居易州五公山，戚族相

依者數百家。定條約，修武備，又以其暇賦詩習禮，絃歌聲相聞。兵相戒勿犯。尋以國子祭酒徵，不應。先後十一徵，卒不起。晚歲躬耕輝縣夏峯，四方來學者趙御衆等，所居成聚，湯斌亦從受業焉。時嚴史禁，奇逢以著甲申大難錄，幾被逮。事尋解。

奇逢講學，初主陸王，晚更和通朱子之說，以慎獨爲宗，而於人倫日用間體認天理。顧炎武推爲河北學者之宗師。卒年九十二。所著理學宗傳，表周、程、張、邵、朱、陸、薛、王、羅、顧爲十子，別爲諸儒考附之，蓋出獨見云。

子立雅、望雅、博雅、韻雅。立雅，字君建，諸生，國亡不應貢。望雅，字君孚，去諸生。博雅，自有傳。從子度雅，國亡去諸生，從奇逢耕苦。

果中，字于度，保定新城人。諸生。善繼弟子。骯髒有古烈士風。弘光時，錢謙益、陳子龍疏薦。

御衆，字寬夫，灤州人。北京亡，去諸生，徙居密縣。學以事心爲主。

同時從奇逢遊者：

李對，字霞表，雄縣人。去諸生，精易理。隨奇逢數十年。後設教超化山。

隰崇岱，字千里，易州人。去諸生，推河北大儒。

陳鉉，字國鎮，涿州人。從善繼遊，爲陽明學。孝友廬墓，道範嚴整，爲人敬憚。馮銓

欲一見，不得。

王之徵，字五修，安州人。孝子。真實向學。

王體健，字廣生，曲周人。伉爽有經世才。堰水繞城拒寇，寇散去。工詩文，去諸生，年六十三，從夏峯講性命學，深入其奧。卒年七十三。

賈三槐，字正卿，固安人。諸生。父母喪，廬墓。從善繼遊，以樸實醇篤稱。嘗官安慶，妻李死難。國亡不仕。

馬爾楹，字構斯，定興人。父潔，死清兵。終身不應試。侍蘇門最久，采樵自給。奇逢稱曰真友、益友。

高鏞，字淵穎，清苑人。去諸生，振奇慕義，好遊名山水。於從遊中以文學稱。

耿極，字保汝，定興人。於諸生中聞道最早，教授河朔間。與兄權並以孝友稱。太康耿炳慕其爲人，訂爲兄弟，割田宅與居。

刁包，字蒙古，祁州人。天啟七年舉於鄉。敦尚質行，力以斯文爲己任。於城隅闢地爲齋，曰「潛室」，亭曰「肥遯」，日閉戶讀書其中。崇禎末，州城被兵，包毀家倡衆誓固守，城得全。時有二璫主軍事，探卒報敵勢張甚。二璫怒其惑衆，將斬之，包厲聲曰：「必殺彼，

請先殺包。」乃止。二璫相謂曰：「使若居官，其不爲楊、左乎？」兵既去，載送流民，全活甚衆。已聞京師陷，設威宗位，服斬衰，朝夕哭臨。李自成迫授職，包以死拒，幾及於難。會敗，得解。清兵入關，遂不仕。日取宋元諸儒書反復尋究。

其學以謹言行爲要，以程朱爲宗。初從孫奇逢聞良知之學，已讀高攀龍書，喜曰：「不讀此，幾虛過一生。」設主事之。偶有過舉，必展謁悔謝。其勇於自克如此。嘗曰：「爲蓋世豪傑易，爲慊心聖賢難。」又謂：「易之爲書，教人趨吉避凶，言趨正避邪也。以爲趨福避禍，舛已甚矣。」父歿，三日勺水不入口，鬚髮盡白，杖而後起。年六十七，以居母憂，哀毀致疾。將卒，問家事，不答。徐曰：「吾胸中無一事，行矣。」遂瞑。

子再濂，字靜之，去諸生。從王餘佑學。

王餘佑，字介祺，保定新城人。延善子。後世父建善。北京亡，餘佑自魯山歸，傳檄起兵。孫奇逢亦起兵，共復雄縣、新城、容城，斬令。未幾，清兵入，延善爲仇陷，執致北京。三子將從，餘恪以餘佑後世父，不可死，揮之去。清名捕急，乃僧服走太行。久之，奉建善隱易州五公山，人稱五公山人。

餘佑負王佐才，受業奇逢，學兵法，通騎射擊刺，能身躍丈許，弦不虛發，後更從受性命

之學。國亡後，搢紳先生輒橫經講堂，具安車幣帛迎受業，遠近從遊至數百人。既隱山，學無不究。彙古人經世事爲居諸編，皆霸王大略。自少至壯數十年，感慨激昂，一發之詩爲文數千言立就。每談兵述往事及忠孝大節，目炯炯如電，聲如洪鐘。顧平居與人和易，從容簡諒，以講學著書爲事，隱居教授，不求聞達。卒年七十。

同時彭毓宗，字蘊秀，獻縣人。雄糾多力，身長六尺，饒奇計。崇禎十一年清兵至，兄嫂死，負兄子走。十三年又至，民宵走，城將不守。毓宗在城南，見事急，下喝衆不動，乃大開城門，獨握門攄丈許，瞋目躍擊門者。一渠目之，揮衆去，城遂得全，勇名大著。國亡，詩酒浩歌，散財振卹，全活無算。餘佑流寓獻縣，禮下之。餘佑死，收撫其孤孫並著作傳世。

杜越，字君異，定興人。諸生。少師鹿善繼，究極理奧，以明道爲己任。善繼善之。與孫奇逢友好，互相砥礪。左光斗、魏大中諸人被逮，慨然曰：「恥不與黨，古誼豈遂絕乎？奈何令千載笑人寂寂。」乃倡同志，醵金納贖。又匿魏學洧、朱祖文複壁間，不少避。家貧，布衣蔬食，授徒自給，一時名彥咸師事之。國亡後，居新安。新安人化之，風俗一變。

爲學不立門戶，每舉羅洪先書示學者，總歸脫凡近、遊高明之旨，而大本在孝弟，得力在分晰義利。生平志行高潔，以禮進退，嚴於取與，即弟子以一紉爲壽，亦拒不受。然性和

易，年八十餘，未嘗一日不樂。清康熙中舉博學鴻詞。曰：「名誤我。」堅拒之。巡撫以車強載。比試，告老病。昇入，伏而不謁。與傅山同授中書舍人，不拜。兵八十七卒。

同時毛三光，字晴嵐，容城人。奇逢老友。工詩。

殷之紐，字伯芽，雞澤人。選貢。授知縣。負經濟，講學不立門戶，躬行實踐。國亡杜門，長吏一見不得。貧不具醴粥，七奉部檄不出。六經皆有著述，於易尤精。

田極，字象極，高陽人。去諸生，事母盡孝。母歿，泣血三年。專精易學，闡程朱說。教人以修謹誠實爲本。好卹人困，待宗族篤厚。五十年不入公廷。

趙景皋，字知安，鹽山人。崇禎三年舉於鄉。專心性之學，不仕。

同邑霍連，字閏生，亦去諸生。精理學。寬衣博帶，牛車出遊齊魯，所至人爭師之。晚年三謁奇逢。

孔衍學，字養邃，保定新城人。善繼弟子。研陽明學。左、魏之逮，與張果中釀金。有智略。不應試。

喬己百，字百一，臨城人。父若雯，員外郎，死清兵。己百，廩生。少志聖賢，講經濟學，不立門戶，具全體、該大用，寂然闇修。崇禎末，兵科范士髦薦，不起，隱居終。

黃淳耀，字蘊生，嘉定人。體貌魁梧，潛心性命之學，於書無所不窺。性沖和湛靜，喜怒不形於色。案置日曆，有事必書，以驗所養。嘗言：「學必以識爲主。惟其識到，故能斷然。知文章功名節義，其真者一出於道德。」又言：「自唐宋諸大儒以來，率以攘二氏爲任。後賢明道不及諸儒，而獨師其排佛，如角力然，務求相勝，斯亦病矣。」

崇禎十六年成進士，寄弟淵耀書曰：「吾廷試時，鼎甲上殿，嘖嘖稱羨。天地間自有爲數千年一人，數百年一人者。今人不肯爲數千百年之一人，而欲爲三年之一人，可怪也。」遂南歸。

清兵圍城，與侯峒曾日夜登陴守禦，邑人范伯翼及子光啟、光昭出財佐軍。城陷，與淵耀入西林庵。淵耀問淳耀曰：「何如？」淳耀曰：「吾了紗帽事耳。」淳耀問淵耀曰：「子何如？」淵耀曰：「吾亦完秀才事，復何言。」僧無垢曰：「公未受職，可無死！」淳耀曰：「忝名進士，宜爲國死。今託上人，死此清淨土足矣。」索筆書曰：「遺臣黃淳耀死此。嗚呼！進不能宣力皇朝，退不能潔身自隱。讀書寡益，學道無成，耿耿不沒，此心而已。異日寇氛復靖，中華士庶復見天日，論其世者當知余心。」與淵耀冠帶分左右就縊。暴屍七晝夜，神色不變。弟子戴亮爲之殯葬。

子塋，字雲沼。工詩書。不試，不見當事。卒年七十五。

淵耀，字偉恭，諸生。律已嚴恪，與兄相師友。就縊時，見淳耀頭幘墜地，復下拾而冠之，乃引決。妻王亦死。淳耀，隆武時贈湖廣道御史，永曆時晋太嘗少卿。

亮，字采臣，嘉定人。去諸生。清舉邊才、鄉飲，皆不赴。

沈國模，字求如，餘姚人。諸生。嘗入劉宗周證人社，歸闢姚江書院，以明道爲己任。與史孝咸、管宗聖申明良知之學。其學或以爲近禪，而言行敦潔，較然不欺其志，故推醇儒。

祁彪佳與國模善，巡按南直，一日杖殺巨憝數人。會國模至，欣然以告。國模字彪佳曰：「世培亦曾聞曾子云哀矜弗喜乎？」彪佳後嘗語人：「吾每慮囚，必念求如，恐倉卒喜怒過當也。」南京亡，聞宗周絕粒死，哭之慟，與王朝式、邵曾可、蘇元璞、鄭錫元、史標、邵元長、韓孔當、俞長民講學益勤。卒年八十二。

孝咸，字子虛，餘姚人。諸生。弘光初薦真儒，監國魯王以安車徵。繼主姚江書院。嘗曰：「空談易，對境難。於居處恭、執事敬、與人忠三語，精察而力行之，其庶幾乎！」家貧，日食一粥，泊如也。卒年七十八。子起曾，字尊聞，不試。弟孝復，字子復，守家學。北京亡後卒。

朝式，字金如，紹興山陰人。嘗入證人社。宗周主誠意，朝式守致知，曰：「學不從良知入，必有誠非所誠之蔽。」宗周稱其志願大而骨力堅，所成就未可量。崇禎末，浙中大饑，朝式倡賑粟，全活甚衆。時天下大亂，將走四方求奇士，謀治安戰守策，不果行。國變後，旋卒。

曾可，字子唯。姚江書院之立，人頗迂笑之。曾可厲色曰：「不如是，便虛度此生。」遂往學。同儕請業多辨難，曾可獨默然竟日。初以主敬爲學，後專提致知。事孝咸甚謹，晨走十餘里，叩床下問疾，不食而返。月餘，亦病卒。

元璞，字禹氏。北京亡，倡義勤王。

錫元，字奠維。皆承其學。

標，字顯臣。以布衣終。

元長，字長孺。有文名。卒年七十二。

孔當，字仁父。繼主姚江。卒年七十三。

長民，字吾之，副貢。去舉業，繼主姚江。卒年八十六。皆餘姚人。

張履祥，字考夫，桐鄉人。少孤，母訓之成立。爲諸生，恥入社。讀小學，近思錄有得，

師事劉宗周。北京變聞，縞素不食。歸益肆力程朱之書，真知力踐。覺人譖獨體之說，猶近陽明，嘗曰：「東南壇坫，西北干戈，其亂於世，無所上下。東林諸公氣節斬直，然而學術未純。神州陸沈，天地晦盲，生心害政，厥繇傳習。」於是爲傳習錄評。履祥自國亡後，杜門講學。與吳蕃昌、錢寅、凌克貞、沈磊、何汝霖、呂璜、安道、丘雲、張嘉玲、張圓貞交最篤。平居雖盛暑，方巾深衣，端拱若泥塑。舟行百里，坐不少欵。嘗謂三代以下，折衷於程朱，於綱目、朱子文集晨夕不去手。輯劉子粹言，於師門有補救之力。卒年六十四。所著有楊園全書。

履祥恪守朱子居敬窮理之訓，實體諸人倫日用間，爲薛、胡之後勁，開陸隴其之前茅。身處草野，日抱亡國之戚，荒江寂寞中，含冤茹荼，其心固未嘗一日忘天下也。嘗言：「人自著衣至於解衣，終日之間所言所行，須知有多少過差。自解衣至於著衣，終夜之間所思所慮，須知有多少邪妄。有則改之，此爲修身第一義。」又曰：「爲學自不欺始，不欺合自親長始。於親長忍用其欺，安往而不欺者？」又曰：「朱子精微，象山簡率，薛胡謹嚴，陳王放曠。今人多舍朱從陸，尊陳王誦薛胡，固繇人情便簡率而苦精微，樂放曠而畏謹嚴；亦緣百餘年來，陽明之學大行，遂以先入之言爲主。雖間讀程朱書，亦止本陸王之意指摘其短長而已。此種習尚不變，竊憂爲禍未有艾也。」又曰：「學者舍稼穡，別無治生之道。能稼

穡，則無求於人而廉恥立。知稼穡艱難，則不敢妄取於人而禮讓興。廉恥立，禮讓興，而世道可以復古矣，故其所補農者書，皆得諸身試者。兄履禎，亦不通當世。

蕃昌，字仲牧，海鹽人。麟徵子。諸生。師事宗周，與履祥、陳確講學。卒時，母喪未葬，遺命以衰經殮。

從弟謙牧，字哀仲，亦諸生。居母喪過哀，卒於苫次，時人稱爲孝子。

寅，字子虎，嘉興人。宗周弟子。謹造履，亂不廢學。

克貞，字渝安，去諸生。磊，字石長，孝友躬行，以教授終。皆烏程人。

汝霖，字商隱，海鹽人。璜，秀水人。道，嘉興人。雲，桐鄉人。嘉玲，字佩葱，吳江人。

圓貞，字巖貞，桐鄉人。皆從講學。嘉玲棄諸生侍之，詣最深。

又孫台衡，餘姚人。授徒楊園，爲人誠竺，履祥師之。永曆二年卒。

沈昀，字朗思，初名蘭先，字甸華，仁和人。劉宗周弟子。少爲諸生。北京之變，年二十七，棄巾服。刻苦清勵。其論以誠敬爲宗，以適用爲主，而力排佛老。曰：「其精者傍吾儒，其異者不可一日容也。」聞四方士有賢者，即書其姓氏，冀得一見，然不肯妄交。授徒自給，三旬九食以爲嘗。每連日絕粒，采階前馬藍草食之。聞者餽之米，不受。固請，則固